

# Tingkatkan kemahiran, komitmen tenaga akademik UNISSA

Oleh : Saerah Haji Abdul Ghani

Foto : Pg. Amirulnizam Pg. Haji Mohd. Ali

**BANDAR SERI BEGAWAN,** Khamis, 12 Januari. - Menteri Pendidikan, Yang Berhormat Pehin Orang Kaya Indera Pahlawan Dato Seri Setia Awang Haji Suyoi bin Haji Osman berharap agar Universiti Islam Sultan Sharif Ali (UNISSA), sentiasa memastikan para tenaga akademiknya terus berusaha keras mempertingkatkan kemahiran dan komitmen mereka dalam membangun universiti tersebut dan negara.

"Saya juga menyarankan agar para tenaga akademik khususnya yang belum memenuhi syarat untuk berpindah ke Skim Perkhidmatan Tenaga Akademik (SPTA) ini atas sebab-sebab kelayakan akademik atau sebab-sebab tertentu, hendaklah berusaha lebih gigih untuk mempertingkatkan pencapaian masing-masing," ujar Yang Berhormat pada Majlis Doa Kesyukuran sempena Ulang Tahun Ke-10 Penubuhan UNISSA, berlangsung di Auditorium universiti berkenaan.

Menurut Yang Berhormat, perkara ini adalah sangat penting dan relevan, bukan setakat untuk kepentingan diri sendiri tetapi juga adalah untuk kepentingan ummah dan negara untuk memiliki para bijak pandai yang memangkin kepada perkembangan ilmu pengetahuan yang berkualiti tinggi.

Tambah Yang Berhormat, malah dalam masa yang sama akan dapat

menaikkan lagi nama dan reputasi UNISSA sebagai sebuah institusi pengajian tinggi Islam yang digalati di persada antarabangsa.

Yang Berhormat juga berharap kepada para tenaga akademiknya yang lebih *senior* agar dapat membimbing dan menjadi mentor kepada mereka yang lebih *junior*.

Terdahulu, Yang Berhormat menjelaskan, kualiti sesebuah universiti itu bergantung kepada kualiti tenaga akademiknya dan sebagaimana yang dimaklumi, SPTA yang telah diperkenankan oleh Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam pada bulan April 2014 yang lalu itu, adalah untuk memastikan para tenaga akademik di UNISSA dan institusi pengajian tinggi yang lain di negara ini benar-benar mencapai kualiti tenaga akademik yang mampu mempertingkatkan kualiti akademik, penyelidikan dan khidmat kepada masyarakat.

Yang Berhormat seterusnya juga turut berasa gembira, pada mengetahui bahawa program-program jangka pendek yang dibukakan kepada orang ramai mendapat sambutan daripada masyarakat seperti Program Mari Belajar Bahasa Al-Quran, Program Kemahiran Bahasa Al-Quran (PKBQ), Program Memahami dan Menghayati Al-Quran.

"Saya berharap program-program atau kursus-kursus singkat bagi orang ramai seperti ini akan diperkembangkan lagi agar mencakupi ruang lingkup yang luas. Ini menepati sifat UNISSA sebagai sebuah universiti Islam yang bertanggungjawab dalam memberi kefahaman tentang Islam yang betul dan muktabar kepada masyarakat," ujar Yang Berhormat.

Menyentuh tentang khidmat kepada masyarakat, Yang Berhormat mengambil maklum bahawa warga UNISSA, sama ada dari kalangan pelajar atau tenaga akademiknya telah melaksanakan tanggungjawab mereka dengan baik terhadap masyarakat setempat, terutama sekali dalam menyampaikan ceramah-ceramah agama, kuliah-kuliah di masjid serta kesedaran yang begitu tinggi dalam membantu masyarakat yang memerlukan bantuan.

Menurut Yang Berhormat, usaha kebajikan seperti ini hendaklah diteruskan dan diperkasakan lagi bagi memastikan kehidupan masyarakat yang harmoni dan memastikan ajaran Islam yang diajarkan di negara ini adalah yang betul dan selaras dengan fahaman Ahli Sunnah Waljamaah.

Berkenaan dengan penyelidikan pula, Yang Berhormat berharap UNISSA mengambil perhatian yang serius terhadap saranan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam supaya UNISSA memantapkan profil penyelidikannya bagi memastikan UNISSA dapat menggabungkan diri



MENTERI Pendidikan, Yang Berhormat Pehin Orang Kaya Indera Pahlawan Dato Seri Setia Awang Haji Suyoi bin Haji Osman semasa menyampaikan ucapan pada Majlis Doa Kesyukuran sempena Ulang Tahun Ke-10 Penubuhan UNISSA.

dalam kelompok universiti Islam ternama dunia.

Yang Berhormat maklum bahawa UNISSA telah melaksanakan beberapa penyelidikan dan aktif menganjurkan seminar yang dilaksanakan secara kolaborasi dengan beberapa institusi pengajian tinggi luar negara dan Yang Berhormat juga yakin aktiviti secara kolaborasi seperti ini sudah pasti akan dapat mempertingkatkan kualiti dan menaikkan imej UNISSA selain sebagai platform UNISSA untuk memainkan peranannya dalam pembangunan ummah di

peringkat global.

Dalam masa yang sama, UNISSA tegas Yang Berhormat juga perlu menjalankan penyelidikan yang memberi impak sangat besar kepada masyarakat setempat seperti isu-isu sosial merangkumi isu keruntuhan akhlak, penyalahgunaan dadah, ekonomi dan sebagainya.

Yang Berhormat percaya, hasilnya nanti boleh dijadikan rujukan dalam membantu pihak kerajaan dan agensi-agensi tertentu untuk menyelesaikan masalah-masalah tersebut.

## Jadikan UNISSA sebuah pusat ilmu Islam tulen

**BANDAR SERI BEGAWAN,** Khamis, 12 Januari. - Kehadiran Universiti Islam Sultan Sharif Ali (UNISSA) sebagai universiti kedua di Negara Brunei Darussalam mencatat satu lagi sejarah dan menjadi mercu tanda kegemilangan Islam, dan sudah tentu menyemarakkan lagi kecemerlangan pendidikan Islam khususnya peringkat pengajian tinggi di Negara Brunei Darussalam.

Rektor UNISSA, Dr. Haji Norarfan bin Haji Zainal terdahulu berkata, universiti tersebut ditubuhkan pada 1 Januari 2007 atas titah perkenan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam sempena Titah Perutusan Awal Tahun Masihi 2007 dengan harapan yang murni, iaitu untuk menjadikan UNISSA sebagai sebuah pusat ilmu Islam tulen, yang melahirkan para ulama dan cendekiawan berwibawa dan mampu memenuhi aspirasi negara.

Ke arah itu menurut Dr. Haji Norarfan, UNISSA menetapkan visinya untuk menjadi sebuah universiti Islam tulen bertaraf antarabangsa yang progresif dan dinamik berteraskan Al-Quran dan As-Sunnah.

"Sebagai sebuah universiti yang baharu ketika itu, sudah tentu banyak ujian dan cabaran yang dihadapi sehingga UNISSA kini, alhamdulillah dengan limpah taufik dan izin Allah Subhanahu Wata'ala jua, UNISSA masih mampu berdiri dan melaksanakan amanahnya sebagai-

mana yang dihasratkan," ujarnya pada Majlis Doa Kesyukuran sempena Ulang Tahun Ke-10 Penubuhan UNISSA berlangsung di Auditorium universiti berkenaan.

Hadir selaku tetamu kehormat pada majlis tersebut ialah Menteri Pendidikan, Yang Berhormat Pehin Orang Kaya Indera Pahlawan Dato Seri Setia Awang Haji Suyoi bin Haji Osman.

Dr. Haji Norarfan menjelaskan, sungguhpun beberapa kemajuan telah berjaya dicapai jelasnya, namun UNISSA tidak seharusnya berpeluk tubuh dan berpuas hati dengan pencapaiannya setakat ini dan UNISSA menyedari, masih banyak perkara yang perlu diambil perhatian dan dipertingkatkan dari semasa ke semasa dalam usaha UNISSA 'berdiri sama tinggi, duduk sama rendah' bersama-sama dengan institusi pengajian tinggi pada peringkat serantau dan antarabangsa.

Sepanjang satu dekad tambahnya, UNISSA telah diterajui oleh seramai empat orang rektor, yang masing-masing memainkan peranan signifikan terhadap perkembangan dan kemajuan UNISSA yang mana beliau dan rakan-rakan seperjuangannya di UNISSA, hanya meneruskan legasi yang ditinggalkan bagi memastikan pembangunan UNISSA berjalan dengan lancar dan terarah.

Beliau seterusnya berkata, bermula dengan kemasukan pelajar seramai 107 orang pada tahun pertama penubuhannya, kini pelajar UNISSA

menjangkau seramai 889 pelajar dalam pelbagai peringkat program pengajian sama ada ijazah sarjana muda mahupun peringkat ijazah pasca sarjana yang menyaksikan purata peningkatan kemasukan pelajar baharu setiap tahun sebanyak 17 peratus.

Peningkatan ini ujarnya, dijangka berterusan pada tahun-tahun akan datang dengan pengembangan program akademik yang lebih dinamik, relevan dan fleksibel yang akan ditawarkan UNISSA pada masa akan datang dan perkembangan ini dipacu lagi atas kesedaran yang tinggi dari kalangan para belia dewasa ini untuk melanjutkan pengajian ke peringkat lebih tinggi sejajar dengan Wawasan Brunei 2035.

Ketika ini UNISSA tambahnya, sedang menawarkan sebanyak 30 program akademik dalam pelbagai peringkat dan bidang pengajian merangkumi bidang Usuluddin, Syariah, Undang-Undang, Bahasa Arab, Tamadun Islam, Tahfiz dan Qira'at, Keusahawanan dan Kewangan Islam, berbanding 10 tahun lalu di mana hanya 10 program akademik sahaja ditawarkan ketika itu.

"InsyaaAllah, menjelang 2025, lebih banyak lagi program akademik akan ditawarkan mengikut keperluan dan tuntutan semasa. Ini termasuk program dalam bidang pengurusan dan kepimpinan Islam, industri halal, komunikasi dan lain-lain program yang mendukung Wawasan Brunei 2035," ujarnya.

Dalam usahanya memberikan sumbangan signifikan terhadap kemantapan pelaksanaan Perintah Kanun Hukuman Jenayah Syariah 2013 katanya lagi, UNISSA menawarkan pelbagai peringkat program pengajian dalam bidang undang-undang.

Menurutnya, antara program yang mendapat sambutan yang menggalakkan ialah, Program Dwi Ijazah Sarjana Muda Undang-Undang dan Sarjana Muda Perundangan Syariah (LL.B dan BSL) yang mengambil masa pengajian selama lima tahun.

Beliau menambah, InsyaaAllah, UNISSA terus beriltizam untuk meningkatkan kualiti akademiknya dan bersedia menawarkan program-program akademik merentasi disiplin dalam usaha membantu kerajaan melahirkan 'Generasi Beragama dan Progresif' dengan menyediakan program-program akademik yang lebih fleksibel, dinamik dan *marketable* berasaskan Al-Quran dan As-Sunnah bagi memenuhi keperluan dan pembangunan negara.

"InsyaaAllah, UNISSA mampu melakukannya. Ini kerana kekuatan UNISSA terserlah dari segi teras pengajian dan penggunaan bahasa pengantar yang digunakan dalam pengajian di mana UNISSA merupakan satu-satunya universiti awam di Negara Brunei Darussalam yang menerapkan sepenuhnya penggunaan bahasa Arab dan Inggeris dalam program-program pengajian

yang ditawarkan, menjadikannya berpotensi menjadi hub pengajian tinggi Islam serantau," ujarnya.

Sebagaimana kemajuan yang diraih dalam aspek akademik katanya, UNISSA juga sangat komited untuk mengembangkan fakulti dan pusat kecemerlangan akademiknya sesuai dengan keperluan dan tuntutan semasa.

Menurutnya lagi, bermula hanya dengan empat buah fakulti dan tiga buah pusat pada tahun 2007, kini UNISSA mempunyai lima buah fakulti iaitu Fakulti Usuluddin (FU), Fakulti Syariah dan Undang-Undang (FSU), Fakulti Bahasa Arab (FBA), Fakulti Ekonomi dan Kewangan Islam (FEKIm) dan yang terkini, Fakulti Pengurusan Pembangunan Islam (FPPI).

Beliau berkata, dua buah pusat kecemerlangan akademik yang ada pada ketika ini ialah, Pusat Penyelidikan Mazhab Syafi'i (PPMS) dan Pusat Penataran Ilmu dan Bahasa (PPIB) serta lima buah pusat dan bahagian pengurusan iaitu Pusat Penerbitan (PPP), Pusat Multimedia dan Teknologi (PMT), Pusat Hal Ehwal Perhubungan Awam dan Antarabangsa (PusPAA) dan Bahagian Hal Ehwal Pelajar.

Tambahnya, perkembangan UNISSA juga membawa kepada penubuhan tujuh unit pengurusan akademik dan pentadbiran iaitu Unit Terjemahan, Unit Jaminan Kualiti, Unit Pembelajaran Sepanjang Hayat, Unit Unitech, Unit Teknologi Pendidikan dan Estet.